

Sayumi

Alles um mich numm is stille. Isch stehe vorm Resde meener ehemalschn
Hornzsche. Mei Nischel midn Haarn is vom Feier angogelt un mei grauer,
gnielanger Rogg is an unzählschn Fleggn eingeschnibblt. Meene
Knebbberdsschn dun weh bis uff de Knochn und ich wünscht, 'sch könnt
bläckn. Doch trotz aller Mieh kummt kee Laud ieber meene Schnuhde, bis
auf ähn kräftisches, heeßes Adm. Mei Hämde is uffm Buggl durschn diiefn
Schnidd zerruppt un isch mergs geronnene Subbe uf meinm Buggl. Meine
Beene sind dauhb, 'sch kann mich ni beweschn.

'Sch kann nurr in dä Fernä stiern, gugge hinabb uff das, wass eema mei
prächtsches Näste daheeme geweäsn is. Dord sähsch die riieeesn Hüddn in
sich zusammwammsn. Ohne Geplärre gehm die massivn Hüddn under ihm
eeschnen Gewischt nach und die Muzeln und dor Dregg verfinstern 'n s'
Lischt.

Isch weeiß nur, dass alles wesch is: Meine bugglische Verwandtschaft,
meine Gumbels und de Wissensklopper.

Ei verbibsch, s alles zu Ende -- Ende im Glände.

S Lebn guddscht vorbei, wens mit eem Mah alles vorbei is. S Leben
rahste so fix und mir blieb nur a biddl Zeid, meene erst vor kurzem zu
Ende gewordne Kindheet und Juhchend hindor mir zu lassn. 'Sch riesch
nüscht, 'sch fiiehl nüscht, här nur mei eeschnen Adm, der sich muddelnd
sein Wäsch aus dor Lunge dursch meene Gusche naus suchd.

Nu spürsch bissl was... was anders! Ich mergs full, 'sch bin ni mehr
alleene un häre bissl was. Es dampert was, schlehhffnde, stolpärnde
Schridde. Mirs so, als wärns meene eischenen.

'Sch gugge weider inne Färne und säh, wie de Stahlseile dorr riesn
Hängebrigge, welche 's Nord- und Siehdneste iiebern Fluss mitnander

vergubbelt, nachgähbn. Ohne Gebläage reißen se rugg zugg un wern dursch
de sthohbsche, rohd gefährbdä Luft gedriehm. Dor eenzsche Stolz vom
Neste klappt in sich zusamm wie'n Garddnhaus beim Schgahdhamd.

Jahrzähntelanges Iiberlehm und Zerfalln kumm nu zusamm in wenschn
Auschnblickn ausm Nüsch.

Isch spürhs nu genau: 'Sch bin nu ni mehr alleene. Mei Adm wird fixer.
'Sch wend meine Neppe zu meinor Lingn un glodds full in meene eeschne
Fissaschä -- diieef duds weh, fuller Drauer un Verzweiflung.

Aber een Word brennts in mei Nischel ein wies hitzsche Feuer:

... Armacom ...